


५७
५७
सप्तपुर महाविहार

व .

आर्यश्रीवसुन्धरादेवीया परिचय




अन्वेषक

हेराकाजी वज्राचार्य




मणिकुल विहार

त्रिरत्न विहार



वसुन्धरा व्रत-पूजाया लसताय् पिथना

सप्तपुर महाविहार व आर्यश्रीवसुन्धरादेवीया परिचय



अन्वेषक :
हेराकाजी वज्राचार्य



प्रकाशक :
वसुन्धरा पूजा मूल समिति
सप्तपुर महाविहार
चिकंबही, च्यासःत्वाः, यल ।

प्रकाशक :
वसुन्धरा पूजा मूल समिति
सप्तपुर महाविहार
चिकंबही, च्यासःत्वाः, यल ।

ढापां खुत्ति :
५०० गू

पिथणा ढूँ :
बुद्ध सम्बत् २५४६
नेपाल सम्बत् १९२२ जैलागा तृतीया, गातिला
(२०५९ आश्विन ८ गते मंगलवार)

सर्वाधिकार :
अन्वेषकयाके सुरक्षित

देवः किपा :
आर्यश्रीवसुन्धरादेवी सहित सप्तपुर महाविहारया मू देगः

थाकू :
बागमति छापाखाना, गाःबाहाः, वनबाहाः, फोन ल्याः ५३३८४७

धलः पौ

विषय	पौ ल्याः
१) बुद्ध वन्दना	-
२) शुभकामना सन्देश	-
३) पिकाःपाखें	क
४) भूमिका	ग
५) सप्तपुर महाविहारया परिचय	
(क) सप्तपुर महाविहार-चिकबहीया वर्तमान स्वरूप	१
(ख) ऐतिहासिक पृष्ठभूमि	५
(ग) सप्तपुर महाविहार संघ व कर्तव्य	८
(घ) रितिथिति गुथि	९
(ङ) विशेषता	९
(च) कचाबही	१०
६) आर्यश्रीवसुन्धरानामधारणीस्तोत्रम्	११
७) आर्यश्रीवसुन्धरादेवीया परिचय	
(क) वसुन्धराया शब्दार्थ व प्रतीकात्मक स्वरूप	१३
(ख) वसुन्धरादेवीया ध्यान व अर्थ विशुद्धि	१४
(ग) वसुन्धरा व्रत-गातिला धलं व थ्वया दि	१८
(घ) यलय वसुन्धरा पूजा व थुकिया परम्परा	१९
(ङ) वसुन्धरा पूजाया स्थाननाम धलः	२१
८) वसुन्धरा पूजा मूल समिति	२३
९) सन्दर्भ ग्रन्थ-सूची	२५

सप्तपुर महाविहार सुधार समिति

चिकंबही, च्यासःत्वाः, यल

शुभ-कामना

सप्तपुर महाविहार, चिकंबही पाखें इलय् ब्यलय् थी थी ज्याभवःत यानावयाच्चंगु सकसिनं स्यूगु हे खँ खः ।

ध्व हे सिलसिलाय् यलय् दयदसं न्याय्का वयाच्चंगु, अन्न, रत्न व धन परिपूर्ण याना बिज्याईम्ह श्री वसुन्धरादेवीया व्रत व नगर परिक्रमा थुगु दय् सप्तपुर महाविहार चिकंबहीया ग्वसालय् न्याय्के दुगु तसकं हे लय्ताया खँ खः । थुगु व्रत व नगर परिक्रमाय् सकल त्वाःया दाजु, किजा, तता, केहेपिसं ग्वहालि याना ज्याभवः भः भः धाय्का बिज्याई/दिई धैगु भलसा कया ।

नापं थुगु हे उपलक्षय् थुगु बहीया परिचय सहित वसुन्धरादेवीया महिमायात कया “सप्तपुर महाविहार व आर्यश्रीवसुन्धरादेवीया परिचय” नामक सफू छगू प्रकाशित जुइगुलिं भन ज्याभवः भः भः धाईगु भलसा कया । थुगु सफू प्रकाशन सुथां लाक्क पिब्वय् फय्माः नापं वसुन्धरादेवी सकल प्राणीपित उदार याय्माः धका कामना याना । सुभाय् ।

लेखराज वैद्य

थपाः आजु लेखराज वैद्य
सप्तपुर महाविहार

ललितराज वैद्य

आजु ललितराज वैद्य
नायो
सप्तपुर महाविहार सुधार समिति

तिथि : ने. सं. ११२२ जेलाख् एकादशी मंगलवाः ।

बुद्ध वन्दना

सर्वबुद्धं नमस्यामि धर्मं च जिनभाषितं ।

संघं च शील सम्पन्नं रत्नत्रयं नमाम्यहं ॥

रत्नत्रयं मे शरणं सर्वप्रतिदिशाम्यघं ।

अनुमोदे जगत्पुण्यं बुद्धबोधौ दधे मनः ॥

आबोधौ शरणंयामि बुद्धधर्म गणोत्तमं ।

बोधौचित्तं करोम्येषं स्वपरार्थं प्रसिद्धये ॥

पिकाःपाखें

ऐतिहासिक कालनिसें लोकप्रिय जुइक विभिन्न बौद्ध संस्कृतिं जायाचवंगु, यलया च्यासःत्वाःलय् लाःगु सप्तपुर महाविहारया थःगु हे इतिहास दु । यलया नीप्यंगू बही मध्ये दक्कसिबे तःधंगु थ्व बही खः । थाय् तक्कूगु जक मखयानं थ्व बहीयात न्ह्याबलें थ्वया प्यखेंर चाहिकातःगु त्वाः त्वालं ग्वहालि बिया ज्याभवः न्हाकावयाचवंगु खँ वि. सं. २०२६ सालं बु. सं. २५९३ या लसताय् यलया सम्यक्चः थ्यंक बिज्याकाः बुद्धजयन्तीया पाः फयाः हनागुलिं क्यनाचवंगु दु ।

थौ वया अन्न, रत्न, धन आदि परिपूर्ण यानाबिज्याइम्ह श्रीवसुन्धरादेवीया व्रत व पूजा नं तःजिक न्यायकेत थ्व हे त्वाःया दाजु किजापिसं ग्वहालि यानाचवना बिज्याःगु/दीगु दु । नापं वसुन्धरा पूजाया लसताय् सकलसिगु ग्वहालिं हे थ्व “सप्तपुर महाविहार व आर्यश्रीवसुन्धरादेवीया परिचय” नामक सफू पिकाये फत । गुकीया श्रेय ला थ्व सप्तपुर महाविहार वसुन्धरा पूजा मूल समितियात लाःवनी ।

बुद्धधर्मयाः क्षेत्रय् विशिष्ट योगदान यानाचवनाबिज्याःम्ह श्रीहेराकाजी वज्राचार्यजुया च्वसां पिज्वःगु सप्तपुर महाविहार व आर्यश्रीवसुन्धरादेवीया परिचय विषयय् दुग्यंगु अनुसन्धानात्मक च्वसूया स्तर गुलिग्यं धैगु खँ वसपोलया न्हापा न्हापा पिदने धुंकूगु सफू, च्वसु स्वयंबले नं बाँलाक सी दु ।

थज्याःगु ग्यसु ग्यंगु सफू पिकाय् दयाः जिपिं सप्तपुर महाविहार वसुन्धरा पूजा मूल समिति व सप्तपुर महाविहारया सकल परिवार तसकं लय्ताःगु दु । थुकीया लागी वसपोलप्रति आभार व्यक्त यानागु जुल । थज्याःगु च्वसु वसपोलपाखें लिपा लिपा नं पिदना च्वनेमा धैगु मनंतुसे थ्व प्राज्ञिक कृति जिमित पिथनेगु ह्वःताः चूलाकाब्यूगुलिं वसपोलयात सुभाय् देछाया च्वना ।

अन्तय् थःगु व्यस्त ईयात नं वास्ता मयाःसे, छफुति हे अल्छी मचाःसे चां न्हि
 यानाः थ्व सफू पिकाय्गु ग्वहालि याना बिज्याःम्ह श्रीहेराकाजी वज्राचार्यजुयात
 दुनुगलनिसें हानं छकः सुभाय् बियाच्चना । थ्व विहारया विषययात कयाः विभिन्न खं
 कनाबिज्याःपिं श्रद्धेय आजुपिं प्रति कृतज्ञता ज्ञापन यानाच्चना । अथे हे माःगु ग्वहालि
 यानाबिज्याःपिं/दीपिं सकल दाजु किजापिन्त नं दुनुगलनिसें सुभाय् देछानाच्चना ।

ने. सं. ११२२ जेलाथ्व ११, सोमवार

वि. सं. २०५९ भाद्र ३१

ई. सं. २००२ सेप्टेम्बर १६

सिद्धिबहादुर शाक्य

अध्यक्ष

वसुन्धरा पूजा मूल समिति

सप्तपुर महाविहार

चिकबही, च्यासःत्वाः, यल ।

भूमिका

बुद्धधर्मया महान् प्रचारक एवं संरक्षक तथा बुद्ध शासनय् दकले आपाः विहार निर्माताया श्रेय दुम्ह भारतवर्षया सम्राट अशोकया राज्यकालय् यल नगरय् प्यंगू दिशाय् प्यंगः स्तूपया निर्माण जूवंगु खः । थनया थ्वहे प्यंगः अशोकस्तूपयात आपाः महत्त्व बियाः, थुकीयात हे मूल केन्द्र नालाः, थ्वया दुने जक आपाः ल्याखय् महाविहार (बाहाः), मध्यमक विहार (बही), सामान्य विहारादि स्थापना जूवंगु जुल ।

धार्मिक व सांस्कृतिक दृष्टिकोणं नं महत्त्वपूर्णगु ऐतिहासिक यल नगर, नेपालमण्डलया स्वंगू प्रमुख नगर मध्यय् आपाः ल्याखय् बौद्ध विहार निर्माण जुयाच्चंगु नगरया रूपय् नं प्रसिद्ध जुयाच्चंगु दु ।

थन नीस्वनातःगु आपालं विहारते मध्यय् नं मूल बौद्ध विहारया ल्याखय् भिन्त्याबाहाः व भिंखुबहीयात नालावयाच्चंगु दु । लिपा थनया भिन्त्याबाहाःया दुने चोबाहाः, कीपूबाहाः व सिबाहाः स्वंगू मू बाहाःया रूपय् दुथ्यावनाः मू बाहाःया ल्याः भिन्त्याबाहाः जूवंगु जुल । अथे हे थनया भिंखुबहीया दुने नं लिपा कीपूबही, बंगबही व वाबही यानाः स्वबही मू बहीया ल्याखय् दुथ्यावनाः मू बहीया ल्याः भिंखुबही जूवंगु जुल । हानं, थ्वहे भिंखुबहीया दुने नं छगूया निगू-स्वंगू बहीया रूप काःवंगु जुयाः थुकीया ल्याः नीप्यबही जूवंगु जुल । थनया थ्वहे नीप्यबही दुने नं लिपा पूच्च थथूबही, किनुबही, तःधंगु ख्वाय्बही, चीधंगु ख्वाय्बही, इलाय्बही, थपाबही यानाः मुक्कं खुबहीया बहीसंघ न्हनावंगु जुल । थथे संघ न्हनावंगु बही विहारय् थौकन्हय् उगु बही विहार नाप सम्बन्ध दूगु बाहाः बहीया संघपिसं संरक्षण यायेगु ज्या जुयाच्चंगु जुल ।

महाविहार (बाहाः) व मध्यमक विहार (बही) याना निथी कथं नालावयाच्चंगु थनया प्रत्येक बौद्ध विहारयात संस्कृत व स्थानीय यानाः निगू नामं म्हसिकावयाच्चंगु दु ।

यलया भिञ्च्यागू महाविहार-बाहाःया क्रमानुसारया नां :-

- | | |
|--------------------------|-----------------|
| १) जेष्ठवर्ण महाविहार | - तंगःबाहाः । |
| २) धर्मकीर्ति महाविहार | - तःबाहाः । |
| ३) हिरण्यवर्ण महाविहार | - क्वाःबाहाः । |
| ४) रत्नाकर महाविहार | - हःखबाहाः । |
| ५) यशोधर महाविहार | - बूबाहाः । |
| ६) दत्तनाम महाविहार | - दौबाहाः । |
| ७) गुणलक्ष्मी महाविहार | - धुम्बाहाः । |
| ८) चक्रवर्ण महाविहार | - चुकबाहाः । |
| ९) वज्रकीर्ति महाविहार | - वंबाहाः । |
| १०) ज्योतिवर्ण महाविहार | - ज्योबाहाः । |
| ११) वैशवर्ण महाविहार | - गुजिबाहाः । |
| १२) मयूरवर्ण महाविहार | - भिन्छेबाहाः । |
| १३) रूद्रवर्ण महाविहार | - ओकुबाहाः । |
| १४) जयमनोहर महाविहार | - सौबाहाः । |
| १५) बलाधरगुप्त महाविहार | - यछुबाहाः । |
| १६) कच्छपालगिरी महाविहार | - चोबाहाः । |
| १७) जगतपाल महाविहार | - क्यपुबाहाः । |
| १८) श्रीवच्छ महाविहार | - सिबाहाः । |

यलया नीप्यंगू मध्यमक विहार-बहीया नां :-

- | | |
|------------------------|--------------------|
| १) यम्पि महाविहार | - ईबही । |
| २) ललितवर्ण महाविहार | - कोन्तीबही । |
| ३) इखाछें बही : | |
| क) नापिचन्द्र महाविहार | - दुन्तुबही । |
| ख) गोपिचन्द्र महाविहार | - पित्तुबही । |
| ४) पूच्चबही : | |
| क) अक्षयेश्वर महाविहार | - पूच्च थथूबही । |
| ख) रक्षयेश्वर महाविहार | - पूच्च क्वथूबही । |

- ५) लोकाकीर्ति महाविहार - नःबही ।
 ६) मणिमण्डप महाविहार - धवगाबही ।
 ७) सप्तपुर महाविहार - चिकबही ।
 ८) जेष्ठवर्ण महाविहार - ज्याबाहाःबही ।
 ९) राजश्री महाविहार - ईबाहाःबही ।
 १०) चन्द्रसूर्य महाविहार - न्हाय्कबही ।
 ११) गुइतःबही :
 क) गुस्तल महाविहार - मू गुइतःबही ।
 ख) प्रथमश्री महाविहार - तःधंगु गुइतःबही ।
 ग) वसुच्चशील महाविहार - चीधंगु गुइतःबही ।
 १२) जयश्री महाविहार - उबाहाःबही ।
 १३) लोककीर्ति महाविहार - किनुबही ।
 १४) ख्वाय्बही :
 क) कामुकनाम महाविहार - तःधंगु ख्वाय्बही ।
 ख) कामुकनाम महाविहार - चीधंगु ख्वाय्बही ।
 १५) इतिराज महाविहार - इलाय्बही ।
 १६) स्थविरपात्र महाविहार - थपाःबही ।
 १७) पद्मकीर्तिगिरी महाविहार - क्यपूबही ।
 १८) अमरावतिपुर महाविहार - बुंगबही ।
 १९) जनकल्याण महाविहार - वाबही ।

च्चय् न्ह्यथनागु बौद्धविहार मध्यय् सप्तपुर महाविहार-चिकबही छगू नं मू बहीया ल्याखय् दुथ्यानाच्चंगु जुल । बही विहारया मौलिक परम्परा व वास्तुकला दुथ्यानाच्चंगु थुगु बहीपाखें यलय् दय्दसं न्ह्यानावयाच्चंगु वसुन्धरा पूजायागु थुगुसीया पाः फयाः वसुन्धराव्रत व पूजाया ज्या न्ह्यायेत्यंगु दु । थुगु ज्या न्ह्याकावनेत वसुन्धरा पूजा मूल समिति, सप्तपुर महाविहार-चिकबही, च्यासःत्वाः, यल छगू नीस्वंगु जुल । थ्वहे समितिपाखें वसुन्धरा पूजाया लसताय् सप्तपुर महाविहार व वसुन्धरादेवीया विषययात कयाः सफू छगू नं पिथनेगु मनंतुगु जुल । थुगु ज्याया लागी मूल समारोह समितिया नायः भाजु सिद्धिबहादुर शाक्यजु थःतः भाला बियाबिज्याःगु जुल । थःम्हं नं थुगु कार्ययात धर्मकार्य भाःपियाः थुगु सफू तयार यानागु जुल ।


‘सप्तपुर महाविहार व आर्यश्रीवसुन्धरादेवीया परिचय’ नांगु थुगु सफू पिथनेगु ज्याय् चिकंवहीया श्रद्धेय आजुपिं, विशेषयाना आजु लक्ष्मीबहादुर शाक्य व संघया दुजः सिद्धिबहादुर शाक्य, सुरेन्द्र शाक्य, देवबहादुर शाक्य, नविन शाक्य, बाबुराम शाक्य, सुरेश शाक्य, निकेश शाक्य सहित मेमेपिं संघया दुजःपिनिगु पाखें नं ग्वहालि जूवंगु दु । अथे हे, थुगु कार्यय् लोटस रिसर्च सेन्टर, यल व उगु सेन्टरया अध्यक्ष प्रा डा वज्रराज शाक्य नापं चूर्णबहादुर वज्राचार्य, माणिक वज्राचार्य, मणिश शाक्यपिनिगु पाखें नं ग्वहालि जूवंगु दु । थुकीया लागी वसपोलपिं सकसितं हार्दिक कृतज्ञता ज्ञापन व सुभाय् देछायाचवना । नापं वसुन्धरा पूजा मूल समारोह समिति पाखें सफू प्रकाशन यानाव्यूगुलिं समारोह समितिया नायः सहित सम्पूर्ण जःदुजःपिन्त नं हार्दिक सुभाय् देछानागु जुल ।

इलय् हे सफूयात मूर्तरूप बियाः सिधयेकाव्यूगुलिं बागमती छापाखाना परिवारयात नं सुभाय् बियाचवना ।

अन्तय्, सकलसिया धर्मचित्त उत्पन्न जुयाः सदां भिं जुइमाः धकाः मंगलमय कामना यानागु जुल । अस्तु ।

ने. सं. ११२२ जंलाख अष्टमी
(२०५९ भाद्र २९ गते शनिवार)

हेराकाजी वज्राचार्य
यशोधर महाविहार
तःजः, धवलगाः, यल ।



सप्तपुर महाविहारया गन्धुरी देवता

सप्तपुर महाविहारया परिचय

सप्तपुर महाविहार-चिकंबहीया वर्तमान स्वरूप :

नेपालमण्डल-नेपाःगाः धार्मिक, सांस्कृतिक व ऐतिहासिक दृष्टिकोणं तस्सक महत्वपूर्णगु थाय् खः । थन प्राचीनकालनिसैं बुद्धधर्म प्रचार जुयाः थासंथाय् आपालं बौद्धविहार नीस्वनेगु ज्या जूवंगु जुल । बौद्धसमाजयात शिक्षित यानाः धर्मानुकूल जीवन हनावनेतमाःगु बुद्धधर्म व थुगु हे धर्मकथया शिक्षा-दीक्षा बिइगु धार्मिक व सांस्कृतिक ज्याभवात न्ह्याकेगु प्रमुख स्थलया रूपय् बौद्धविहारयात कयातःगु दु ।

मूलरूपं, बुद्धधर्मय् दीक्षित जुयाः बौद्ध संघय् प्रवेश जुइगु पवित्र स्थलया रूपय् कयातःगु थुजोगु बौद्धविहारयात बौद्धसमाजं बाहाः व बही यानाः निथीकथं नालावयाच्चंगु दु ।

थ्वहे निथीकथंया विहार यल देशय् नं थासंथाय् आपालं हे नीस्वनातःगु दु । थन नीस्वनातःगु विहारत मध्यय् नं मूबाहाःया ल्याखं भिच्याबाहाः व मूबहीया ल्याखं नीप्यबही नालावयाच्चंगु दु । थ्वहे मूबाहाः बही थनयापिनि संघय् प्रवेश जुइगु पवित्र स्थल खः ।

यलया नीप्यबहीया ल्याखय् लानाच्चंगु बही मध्यय् चिकंबही छगू नं खः । थुगु बहीयात संस्कृत नाम 'सप्तपुर महाविहार' धका नामाकरण यानातःगु दु । थुगु बहीयात थनयाम्हे हे शाक्य भिक्षु गौतमश्रीजुं निर्माण यानाथकूगु जुयाः थुगु बहीयात 'गौतमश्री संस्कारित-सप्तपुर महाविहार' धका प्रख्यात जुयाच्चंगु दु । नेपाःया थःगु हे मौलिक परम्परा दुगु व बहीविहारया वास्तुकला दुथ्याकाः यलया संरक्षित यानातःगु बही मध्यय् सप्तपुर महाविहार-चिकंबही छगू नं खः । थुगु बहीया स्वरूपय् नं बहीलिइ दयेमाःगु लक्षण प्रमाण ल्यानाच्चंगु दनी । यल नगरया सिथय् पूर्व-उत्तर ईशान कुनय्, यलया हे पुलांगु बस्ति मध्यय् छगू बस्ति च्यासः त्वालय् चिकंबही स्थापना यानातःगु खः ।

लिच्छवीकालय् च्यागू ल्याखय् लाःगु प्रदेशया रूपय् च्यासःयात दुथ्याकातःगु जुल । थुगु थाय्यात उबलय् अठसिइ प्रदेश धका नामाकरण जूवंगु खः । थ्वहे

अठसिझोयात जनभाषा च्यास-ल्या धायेगुयां लिपा च्यास्ल-च्यासः जूवंगु जुल । मुक्क नेबाःतयंगु बस्ती जुयाच्चंगु थुगु च्यासः त्वालय् यलया प्रसिद्धिपि प्यम्ह भिन्दो मध्यय् छम्ह भिन्दो-च्यासःभिन्दो छम्ह नं स्थापना यानातःगु दु । अथे हे थन थाय्थासय् चिबाहाः, धर्मधातुमण्डल, गणेश, अनेक देवीदेवतापिनिगु मूर्ति, सतः, फलेचा, देगः आदि थी थी धार्मिक व सांस्कृतिक सम्पदा जायाच्चंगु दु । थ्व हे त्वालय् हानं, गाःहिति नं दुथ्यानाच्चंगु दु । गुकीयात च्यासःहिति धाइगु खः । थ्व हे च्यासःहितिया च्वस चिकबही नीस्वनातःगु खः ।

चिकबही थ्यकबनेगु तःपुमछि लंपु दु । थुकी मध्यय् यल मंगलबजार लाय्कूया जःरिखे, मंगः भिन्दोया न्ह्यःनेच्चंगु तुइलाक्व लंपु जुनाः थ्यनीगु बल्खु, भिन्दोलाछि, क्वय्लाछि जुनाः च्यासः ध्वदुइकाः वनेगु छपु लं खःसा मंगलबजारया लाय्कूया खःरिखे पूर्व स्वया वनेब हःखा, सौगः, कुटिसौगः, न्यौट, खपिंछे जुनाः च्यासः ध्वदुइकाः वनेगु मेगु छपु लं । अथे हे मंगःभिन्दोया खःरिखे उत्तर स्वयाः वनेब थ्यनीगु स्वथत्वाःया जःरिखेच्चंगु गःलिं दुहांवनाः कुलिम, भेलाछे, चोछे जुनाः च्यासः ध्वदुइकाः वनेगु लंपु । वथे तु ईबही स्तूपया न्ह्यःनेच्चंगु गःलिं गःछे जुनाः च्यासः ध्वदुइगु लंपु व बालकुमारी वनेगु लंपु जुनाः च्यासः ध्वदुइकाः वनेगु लंपु यानाः मुक्क न्यापु लंपु दूगु जुल ।

सप्तपुर महाविहार-चिकबही दुहांवनेत बहीलुखाया पिनेरिखे त्वहंया भिंछत्वाथः दयेकातःगु दु । थुगु त्वाथः गयाः थहांवनेब बहीलुखा दुने महाकाः छेलिइ फल्वा दयेकातःगु दु । थुगु हे थासय् जःरिखे च्वंगु अंगलय् लिधंकाः महाकाःद्यः छम्ह नं स्वनातःगु दु । थुम्ह महाकाःद्यः वि सं २०२५ साल न्हुगुम्ह दयेकाः स्वनातःगु खः । थनया न्हापायाम्ह महाकाःद्यः जीर्ण जुयावंगु जुयाः उगु हे थासय् न्हुम्ह तःगु जुल ।

चिकबहीलिइ छचालं फः थकयातःगु प्यकुलाःगु चक्कंगु लाय्ब्व दु । लाय्ब्व छफातिं चिकअप्पां सियातःगु दु । थ्व हे थासय् बहीलुखाया चुलचू पूर्वाभिमुख यानाः बहीदेगः छगः नीस्वनातःगु दु । थुगु बहीदेगःया जःखः नितंजाः याना बहीछे दयेकातःगु दु । देगःया न्ह्यःने नं बहीछे दयेकाः क्वातुकातःगु दु । बहीविहारय् दयेमाःगु लक्षण प्रमाण स्वरूप थन नं बहीद्यःया पलि नापं जःखःया बहीछे च्वंगु पलि सरह याना स्वाकातःगु दु । बहीदेगःया जःरिखे, दक्षिण दिशाय् च्वंगु बहीछे थनिं १८ दंति न्ह्यः पुनःनिर्माण जूवंगु खःसा खःरिखे, उत्तर दिशाय् च्वंगु मेगु बहीछे नं पुनःनिर्माण यायेगु ज्या क्वचाये धुंकूगु दु । चिकबहीया देगःछे नं जीर्ण जुयावनाः थनिं निदं न्ह्यः जीर्णोद्धार यायेगु ज्या नं क्वचायेकूगु जुल ।

सप्तपुर महाविहार-चिकबहीया द्यःगलय्-मूलगन्धकूटीइ भूस्पर्श मुद्रा ज्यानाः वज्रपर्यङ्क मुद्राय्, पूर्वाभिमुख यानाबिज्यानाच्चम्ह अक्षोभ्य तथागत छम्ह स्थापना यानातःगु दु । थुम्ह तथागत हे थुगु संघया मूद्यः-गन्धुरीदेवता खः ।

बहीविहारया मूलगन्धकूटी-द्यःकोथाय् बिज्याकातइपिं बहीद्यःयात गन्धुरीदेवता धायेगु चलन दु । बहीसंघयापिं ग्रन्थधूरया लागीं अभ्यास याइपिं जूगुलिं ग्रन्थधूरपिनि देवताया अर्थय् ग्रन्थधुरी देवता गन्धुरीदेवता जूवंगु जुल ।

थनया गन्धुरीदेवताया जवखव च्वांम्बः व पिण्डपात्र धारण यानाच्चपिं शारीपुत्र व मौद्गल्यायणया प्रतीक स्वरूप निम्ह भिक्षुपिनिगु मूर्ति न तयातःगु दु । अथे हे थुगु द्यःगलय् मेमेपिं देवतापिं न स्वनातःगु दु । थुगु बहीद्यःकोथाया मूलुखा सियागु दयेकातःगुयात ने सं. ९८७ श्रावण शुक्ल सप्तमी कुन्हु कलात्मक बुद्धा कियाः लिलया पातां भुनाब्यूगु जुल । थनया मूलुखा फुसय् धातुया पञ्चबुद्धया मूर्ति तयातःगु दु । थ्वया क्वस ज्वाय्गं न खायातःगु दु । थ्व हे मूलुखाया च्वसं त्रिरत्न-बुद्ध, धर्म, संघ स्वरूप अक्षोभ्य मूल यानाः जवय् प्रज्ञापारमितादेवी व खवय् षडक्षेरी लोकेश्वरया मूर्ति दुथ्याकाः थ्वया च्वय् पञ्चबुद्धपिं न्याम्हसिगु न मूर्ति अकितगु कलात्मक त्वःलं छपाः न तयातःगु दु । थुगु त्वःलं ने सं. ९९१ श्रावण शुक्ल १५ या दिनस दुन्ता याःगु खः । त्वःलया ल्यूने पञ्चबुद्धया चाचि च्वयातःगु दु । अथे हे मूलुखा जःखः च्वांम्बः व पिण्डपात्र ज्वनाच्चपिं शारीपुत्र व मौद्गल्यायण निम्ह भिक्षुपिनिगु चाचि न च्वयातःगु दु । हानं, थ्वया हे नाप जःखः अगलय् ने सं. १०२८ स दुन्ता यानातःगु स्वंगः स्वंगः लिलया माणे (मणिचक्र) न स्वनातःगु दु । थुकिया नाप थ्व थासय् थुगु बहीलिसं सम्बन्धितगु ल्वहपौ प्यपाः प्यपाः न तयातःगु दु । थुगु हे थासय् बहीद्यः चाःहुलेगु प्रदक्षिणा मार्गया रूपय् गःलि लंपु तयाः थ्वया छचालं दंहलूपाः तयातःगु दु ।

चिकबहीया द्यःलुखाया न्ह्यःनेच्वंगु त्वाथःया जवखव ने सं. ९९६ श्रावण शुक्ल सप्तमी व ने सं. १०६३ मार्ग शुक्ल पुन्ही कुन्हु दुन्ता यानातःपिं ल्वहया निम्ह सिंह द्वारपालया रूपय् स्वनातःगु दु । थ्वया नाप नाप जवखव ने सं. ९९७ श्रावण शुक्ल अष्टमी कुन्हु दुन्ता जूगु लिलया ध्वाय् निपु न स्वनातःगु दु । थ्व हे द्यःफलय् जःरिखे ने सं. ९८६ मार्गशिर १ स दुन्ता जूगु द्यःगं छगः व खःरिखे ने सं. १०१५ आषाढ बदि ११ स दुन्ता जूगु मेगु छगः द्यःगं यानाः निगः द्यःगं स्थापना यानातःगु दु । थन हे लिक्क देगःया खःरिखे थुगु बही विहारय् दुहां पिहां वनेत सहायक मार्गया रूपय् लुखा छदुवा न चायेकातःगु दु ।

बहीदेगःया द्यःकोथा-गन्धकूटी त्वःताः थ्वया जःखःया भूमितल्लाया न्ह्यःनेरिखे खुल्ला रूपं त्वतातःगु दु । थुगु भूमितल्लां च्वय्, न्हापांगु तल्लाया, मूलुखा फुसय् स्वपाः प्यय्पुंगु कलात्मक सभ्याः छुनातःगु दु । थ्वया ल्युने उग्रतारादेवी (वज्रवाराही) छम्ह नीस्वनाः आगःकोथा दयेकातःगु दु । थुगु हे थासय् थनया वसुन्धरादेवी छम्ह नं स्वनातःगु दु । थनया आगःकोथा त्वःताः थुगु थाय् बार्दली पिकयाः खुल्ला यानातःगु दु । थुगु तल्लायां च्वय् आय्पा पलिं चिनाः थ्वयां नं च्वय् बही विहारया परम्परा कथया देगःचा छगः दयेकाः पुल थकयातःगु दु । आय्पा पलिं चिनातःगु थुगु देगःचिया म्हुःपौ छ्चालिं फय्गं घानातःगु दु । थुगु देगःचाय् गजूया रूपय् सिजःया लुंसिया चैत्य छगः तयाः उकी स्वम्ह नाग सहितगु लुंसिया नागछत्रं कुइकातःगु दु ।

सप्तपुर महाविहारया देगःया जवखवं च्वंगु नितंजाःगु बहीछेंया भूमितल्लाया न्हापा बहिद्यः ब्वयेगु आदि यानावयाच्वंगु खःसां लिपा थुगु बही मिं नयाः थनया आपाः धयाथें धर्मकीर्तित नष्ट जुयावनसा गुलिं हरण जुयावंगुलिं थुगु ज्याभवः थन खनेमदये धुंकल । थौं कन्हय् थुगु थासय् धार्मिक ज्याभवः न्ह्याकेगु, धर्मदेशना यायेगु, पठन-पाठन यायेगु आदिया लागीं सलंशालाया रूपय् क्वातुकातःगु दु । भूमितल्लां च्वय् च्वंगु तल्लाया बार्दली पिकयाः थनया थाय्यात नं क्वातुकाः थुगु बही संघयापिनि पर्व पर्वय् यायेमाःगु विविध ज्या न्ह्याकावनेत छ्यलावयाच्वंगु दु ।

थुगु बहीया लाय्ब्वय्, बहीद्यःया द्यःफः क्वसं यज्ञशाला तयातःगु दुसा थ्वया नापं भवःलाक श्री ५ सुरेन्द्र महाराजाया पर्याय् स्थापना जूगु खं च्वयातःगु वज्र सहितगु ल्वहंया धर्मधातुमण्डल छगः, ने. सं. ९८३ श्रावण कृष्ण पञ्चमी कुन्हु नीस्वनातःगु पञ्चावलियुक्त चैत्य छगः, ने. सं. ७७७ कार्तिक कृष्ण षष्ठीपर सप्तमी कुन्हु नीस्वनातःगु शिखरकूट चैत्य छगः दु । थुगु हे चैत्यया पूर्वाभिमुखय् चैत्यया फः नापं त्रिरत्नया प्रतीक-अक्षोभ्य, प्रज्ञापारमितादेवी व षड्क्षेरी लोकेश्वरया ल्वहंया मूर्ति स्वनातःगु दु । अथे हे थ्वया नापं ने. सं. ९९० श्रावण शुक्ल पञ्चमी कुन्हु नीस्वनातःगु पञ्चावलियुक्त चैत्य छगः नं दु । थुगु चैत्ययात ने. सं. ९८३ शुद्ध श्रावणशुक्ल पञ्चमी कुन्हु जीर्णोद्धार यानाः नापं सुवर्ण चैत्य प्रतिविम्ब प्रतिष्ठा नं याःगु जुल । थुगु खं थ्व हे चैत्यया नापं स्वनातःगु संसल्वहंतय् उल्लेख यानातःगु दु ।

ऐतिहासिक पृष्ठभूमि :

चिकबहीयात सप्तपुर महाविहारया नाप नाप चुपिखा विहार, चिल विहार नं धायेगु याः । थन नीस्वनातःगु ने सं ७७७ या चैत्याभिलेखय् थुगु विहारयात 'श्रीचुपिरि विहार' धकाः उल्लेख जुयाच्चंगु दु । अथे हे थनया ने सं ७८४ या छगू अभिलेखय् 'श्रीचुपिनि विहार' धकाः नं छ्यलातःगु दु । थ्व नां चुपिखा विहारयात हे कयाः धयातःगु स्पष्ट जू वः । थनयापिसं थुगु विहारयात चुपिखा विहार धका म्हसिइकावयाच्चंगुयात न्हापा 'चुपिरि विहार' वा 'चुपिनि विहार' या रूपय् नालावयाच्चंगु जुल । थनया ल्वहंपतिइ थुगु विहारयात चुपिरि, चुपिनि विहार धकाः छ्यलातःगु दु थें, चिल विहार धका च्वयातःगु धाःसा खनेमदु । न्यने दु कथं थुगु थाय् न्हापा चिकसाःया रूपय् छ्यलातःगु खः । लिपा थ्वहे थासय् बहीविहार दयेकूगुलिं थुगु बहीया ना चिकबही जूवंगु खः । अथे हे चिकसाः दूगु थाय्या विहार-चिकसाः विहार धायेगु यानावयाच्चंगुली लिपा भाय् ज्यलाः वनाः चुपिरि, चुपिनि धायेगु याया चुपिखा विहार जूवंगु जुल । थनयापिसं चिलबही विहार कथं नं म्हसिइकावयाच्चंगु थुगु बहीयात लिपा चिलबहीयां चिकबही जूवंगु नं जुइमाः ।

अथे हे थनयापिनि धापु कथं न्हापा थुगु बही दयेकूबलय् बहीया देगः न्हय्तजाः यानाः दयेकातःगु खः । लिपा थन हे नीस्वनातःगु छगः चैत्य मिं पिहांवयाः थुगु बही मिं नयाः पुनःनिर्माण जूवबलय् छतजाः याना जक दयेकूगु जुल । न्हय्तजाः याना बहीदेगः दयेकातःगु जुयाः चिकबहीयात सप्तपुर महाविहार धाःवंगु खः । लुमंके बहःजू गुइतःया प्रथमश्री महाविहार-तःधंगु गुइतःबहीया देगः नं न्हापा गुतजाः याना दयेकातःगु खः । थ्वहे कारण थुगु बहीयात गुतबहीयां गुइतःबही जूवंगु धयावयाच्चंगु नं न्यने दु ।

चिकबहीया उगु छगः चैत्य बरोबर मिं पिहांवइगु अले थ्वहे कारण बही थ्यंक मिं नःगु जुयाः लिपा उगु चैत्ययात च्यासः हितिइ यंकाः स्वनेयंकूगु जुल, गुगु चैत्य अद्यापि उगु थासय् दनी । थनयापिनि धापु कथं थुगु बही न्हय्क्वःतक मिं नये थुंकूगु खः । थुगु बहीलिइ च्वने मजीक मिं नःगुलिं थनयापिं थःपिनि क्वात्तुक सम्बन्ध दूगु गुइतःबहीया मूल गुस्तल विहारस च्ववंगु जुल । चिकबहीसंघयापिं च्वनावंगु जुयाः गुइतःया उगु गुस्तल महाविहारयात चिकबहीचा धायेगु नं चलन आःतक दनि ।

सप्तपुर महाविहार-चिकबहीया स्थापनाकालयात प्रामाणिक रूप क्वःछिइत

क्वःजीक धायेफइगु कथया छुं नं प्रमाण आः तक लुयावःगु मदुनि । थनया धर्मकीर्तित नं गुलि मिं लानाः गुलिं हरण जुयावंगुया कारणं थन पुलांगु धर्मकीर्तिपाखें नं अध्ययन यायेगु सम्भव मदुगु जुल ।

अथे नं बहीया स्वरूप आदियात कयाः अध्ययन यानावनेबलय् थुगु बही यलया पुलांगु बहीया भवलय् लाःवनीगु खनेदःवः । आःतक्क लुयावःगु थनया प्रामाणिक अभिलेख मध्यय् दकले पुलांगु गुइतःया तःधंगु बही-प्रथमश्री महाविहारय् नीस्वनातःगु लिच्छवीकालिन चैत्यया क्वफलय् च्वंगु ने. सं. १४४ यागु अभिलेख खः । थुगु अभिलेखय् चिकंबहीया संस्कारित नां व संस्कृत नां समेतं दुथ्याकातःगु दु । प्राचीन नेपाललिपि छ्यलातःगु थुगु शिलाभिलेखय् ने. सं. वेदाब्धिचन्द्रे (=१४४) जेष्ठकृष्ण एकादशी तिथि शनिश्चरबार कुन्हु महापण्डित शाक्यभिक्षु श्रीगौतमश्री संस्कारित ललितपुरया सप्तपुरी महाविहारया चुकय् दानपति शाक्यभिक्षु श्रीशुभश्री नं धर्मचित्त उत्पत्ति यानाः चिकंअप्पां सियाब्यूगु खं उल्लेख जुयाच्चंगु दु । थुगु अभिलेख अनुसार महापण्डित शाक्यभिक्षु गौतमश्री नं चिकंबही स्वनेगु ज्या यानाः थुगु बहीयात सप्तपुर महाविहार नामाकरण जुयाच्चंगु खं स्पष्ट रूपं च्वयातःगु दु । थुगु अभिलेखया आधार नं चिकंबही थनिं द्वःछि दं न्ह्यः हे निर्माण जुइधुकूगु सिइदु ।

थुगु बहीविहारया मेगु प्रामाणिक अभिलेख धयागु श्रीगणेश देवता प्रतिस्थापना याःगुया खः । ने. सं. ५३५ अंकितगु थुगु अभिलेख थनया बहीद्यःया मूलुखां खःरिखे स्वनातःगु संसल्वहँयागु खः ।

सप्तपुर महाविहारया मेगु प्रामाणिक, थन हे बहीलिइ नीस्वनातःगु, अभिलेखत छसिकथं थथे दु :-

१. ने. सं. ७७७ कार्तिककृष्ण षष्ठीपर सप्तमी कुन्हु थनया शिखरकुट चैत्य प्रतिष्ठा याःगु अभिलेख । थनया शिखरकुट चैत्यया लिक्क स्वनातःगु ल्वहँपतिइ थुगु चैत्य स्थापना याःगुया नापं थनया श्री ३ वज्रवाराहीदेवी, श्री ३ गन्धुरीदेवता जीर्णोद्धार याःगु खं नं उल्लेख यानातःगु दु । थुगु हे ल्वहँपतिइ सप्तपुर महाविहार-श्रीचुपिरि विहार धका नं उल्लेख जुयाच्चंगु दु ।
२. ने. सं. ७८४ आषाढ शुक्लपक्षया सप्तमीपर अष्टमी कुन्हु थन स्वर्णकोष तःगुया अभिलेख । थुगु अभिलेखय् सप्तपुर महाविहारयात 'श्री चुपिनि विहार' धका उल्लेख जुयाच्चंगु दु ।
३. ने. सं. ८२६ माघकृष्ण चतुर्थी कुन्हु श्रीसिकपुलि विहारय् श्री ३ शाक्यमुनि

भगवान् जीर्णोद्धार याःगु व वसपोलयात सिजलय् लुंसिया ल्होने ज्या याःगु खं नं दुथ्याकातःगु दु ।

४. ने सं. ८८३ माघशुक्ल पञ्चमी कुन्हु वज्रवाराहीदेवीयात छुं याःगु । (आखः अस्पष्ट) खं च्वयातःगु दु ।

५. ने सं. ९९८ माघ शुदि ६ कुन्हु देगःया पुरस सुवर्ण चुडामणि गजुरी छाःगुया अभिलेख ।

६. ने सं. १०२० स गन्धुरीदेवतायात थःपिनि दिवंगत जुयावपिनिगु नामं शंख, गं, खादलू, सुवर्ण लेपित तोरण सहित पुरसं छत्र सहित नागराजा स्वम्हतःगुया अभिलेख ।

७. ने सं. १०९६ स गन्धुरीदेवताया श्रीमुखय् लुं स्यूगु खं व थुगु ज्याया दातापिनिगु नामावली समेत उल्लेख यानातःगु अभिलेख ।

च्वय् उल्लेखित अभिलेखया अतिरिक्त सप्तपुर महाविहार, चिकंबहीया मेगु अभिलेखत जोन के लकया 'बुद्धिष्ट मोनाष्ट्रीज अफ नेपाल' सफुतिइ नं दुथ्यानाच्वंगु दु, गुगु थथे खः -

१. ने सं. ५५४ स सप्तपुर महाविहारया प्राङ्गणय् च्वंगु चैत्यय् अमिताभ मूर्ति प्रतिस्थापना याःगु ।

२. ने सं. ५७७ कुन्हु रत्नसम्भवया मूर्ति तःगु ।

३. ने सं. ७३६ कुन्हु गन्धुरीदेवतायात छुं दुन्ता याःगु ।

४. ने सं. ७५८ कुन्हु सप्तपुर महाविहारया देगलय् लुंयां गजू छाःगु ।

५. ने सं. ८०८ कुन्हु थुगु विहारय् श्री मनुचन्द्रया शालिक स्वंगु ।

६. ने सं. ८५४ कुन्हु शाक्यमुनि बुद्ध व वज्रवाराहीयात नित्यपूजा यायेत गुथि दुन्ता ।

७. ने सं. ८५९, ८६० कुन्हु शाक्यमुनि व वज्रवाराहीयात वहःया तिसा दुन्ता याःगु ।

८. ने सं. ९९८ कुन्हु संघपिसं म्हाति न्यामोह दां ल्हानाः सप्तपुर महाविहार जीर्णोद्धार याःगु खं दुथ्याकातःगु ।

९. ने सं. १००५ कुन्हु गुथि हनागुया ल्याःचाः यानातःगु खं ।

१०. ने सं. १०१६ कुन्हु गुथिया लागी आम्दानी जूगु आयस्ताया खं ।

११. ने सं. १०३५ कुन्हु धर्मादित्य धर्माचार्यजु पाखें बुद्धजयन्ती न्ह्याकेगु ज्या, चुडाकर्म समारोह व संघ भोजन याकूगु खंयात कयाः न्ह्यथनातःगु ।

सप्तपुर महाविहारसंघ व कर्तव्य :

सप्तपुर महाविहार-चिकबहीसंघया दुने बुद्धशासन रक्षार्थ भिंगु आचरण यानावनेगुलिइ समर्पित जुयाः थःपिनिगु बहीविहारय् विभिन्न धार्मिक ज्याः न्ह्याकावयाच्चंगु दु । बौद्धसंघय् दुहावनेत दकले न्हापां प्रब्रज्या ग्रहण यानाः भिक्षु जीवन हनेमाःगु बौद्ध परम्पराकथं थुगु विहारय् नं थनया आजुपिसं संघया दुजःपिनि काय् मस्तय्त बन्दे लुनाः प्यन्हुतक भिक्षु जीवन हंकेबियाः संघय् प्रवेश यायेगु ज्या जुयाच्चंगु दु । थुगु ज्या यायेत थन न्याम्ह आजुया व्यवस्था जुयाच्चंगु दु । थपाःजु सहित थुपिं हे न्याम्ह आजुपिनिगु नायकत्वय् संघय् यायेमाःगु विभिन्न धार्मिक व सांस्कृतिक ज्या न्ह्याकावयाच्चंगु जुल । वसपोल आजुपिसं थुगु संघय् पर्व पर्वय् जुइगु पूजा, गुथिइ थकालि जुयाः पूजा यायेगु निसं कयाः थकालि कथं आगमय् पाः कयाः न्हिकं यायेगु, आगंपूजा यायेगु ज्या नं न्ह्याकाच्चंगु जुल । अथे हे संघया दुजःपिं मध्यय् सुं नं आजु तय् थ्यनकि नायः लुइगु, थपाः त्वयेगु ज्याय् नं आजुपिं सम्मिलित जुयाः माःगु धार्मिक ज्या पूर्वकाच्चंगु जुल ।

सप्तपुर महाविहारसंघया दुजःपिनिगु कर्तव्य कथं थकालि कथं थनया गन्धुरीदेवताया थाय् छःपाः फयेगु यानावयाच्चंगु दु । थन प्रत्येक आईतवारं आईतवार छ्वाः तक्क छःपाः च्वनाः देवख्यः चायेकेगु, नित्यपूजा यायेगु, आरति पूजा यायेगु ज्या जुयाच्चंगु दु । अथे हे गुला लच्छियकं आर्यमञ्जुश्रीनामसंगीति गाथा ब्वनेगु, तुतः ब्वनेगु आदि नं जुयाच्चंगु दु ।

बहीसंघय् प्रवेश यायेगु भवलय् बहीसंघयापिनि काय् मस्तय्त बन्दे लुइगु, नायः लुइगु, थपाः त्वयेगु व अन्य विहारया विविध धार्मिक ज्या यानावनेत बहीसंघयापिं गुरुजुपिनिगु पाखें हे सम्पन्न यानावनेमाःगु परम्पराअनुसार थुगु चिकबहीसंघया थुजोगु पूजाया ज्या न्ह्याकावनेत यलया लोकाकीर्ति महाविहार, नःबहीया गुरुजुपिं बिज्याकेगु यानावयाच्चंगु दु । मेगु मचाजंकु, ज्याः जंकु, विवाह आदि सामाजिककथंया धार्मिक ज्याय् बाहाःयापिं गुरुजुपिं बिज्याकाः पूजा याकेगु ज्या न्ह्याकावयाच्चंगु जुल ।

सप्तपुर महाविहार-चिकबहीसंघया नायक जुयाबिज्यानाच्चपिं पञ्चस्थविर आजुपिनिगु नां थुकथं खः -

१. थपाजु - लेखराज वैद्य
२. आजु - ललितराज वैद्य
३. आजु - लक्ष्मीबहादुर शाक्य
४. आजु - छविराज शाक्य
५. आजु - माहिला शाक्य

चिकबहीया सर्वसंघया नां थलखय् थौकन्हय् १६० म्ह शाक्यपिनिगु श्रीनाम उल्लेख जुयाच्चंगु दु ।

रितिथिति गुथि :

सप्तपुर महाविहार संघय् न्हापा तःगुमछि रितिथिति गुथि हनावयाच्चंगु खःसां थौकन्हे आयस्ता बःमलाःगु आदिया कारणं अप्पो धयाथे न्हावने धुंकल । थौकन्हे संघयापिनिगु पाखें ल्हापं व दानदत्त आदि संघया ज्या न्ह्याकाच्चंगु जुल । थौकन्हे संघया दुजःपिं सकलें मुनाः बही बुसाधं यायेगु, गुंला लच्छि, लुंचिद्यः थायेगु, देगुद्यः पूजा, वसुन्धरा व्रत, संघ भोजन आदि ज्या न्ह्याकाच्चंगु दु । थन दैय्दसं हनावयाच्चंगु गुथित थथे दु -

- | | |
|----------------------|---|
| १) बहीद्यः बुसाधं | - बैशाखशुक्ल अष्टमी । |
| २) देगुद्यः पूजा | - बैशाखकृष्ण दशमी (चाछ्वः दिशी) । |
| ३) लुंचिद्यः थायेगु | - श्रावणशुक्ल प्रतिपदा निसें लच्छीयंक । |
| ४) गुंलापारु | - भाद्रशुक्ल प्रतिपदा । |
| ५) नामसंगीति गुथि | - गुंला धुंकाः । |
| ६) वसुन्धराव्रत-पूजा | - आश्विनकृष्ण तृतीया, चतुर्थी । |
| ७) दिशीपूजा | - पौषकृष्ण दशमी । |
| ८) सर्वसंघ गुथि | - माघ पुन्ही । |

विशेषता :


सप्तपुर महाविहार यलया बहीविहारत मध्यय् कचाबही अप्पो दूगु विहार खः । थुगु बहीविहारया प्यंगू कचाबहीया नाप मेगु छगू कचाबही येंया कोटेश्वरय् नं दूगु जुल । थुगु बहीयापिं न्हापानिसें वैद्य ज्याय् निपुणपिं खः । थौ तक्कं थनयापिं आपाःसिनं वैद्य ज्या हे यानावयाच्चंगु दिन । अथे हे थनयापिं राजवैद्य कथं नं प्रसिद्ध जू ।

थनया मेगु विशेषता धयागु बौद्ध जगतय् लुमकेबहःम्ह व्यक्ति श्रीधर्मादित्य धर्माचार्यजुया देन खः । नेपाःया स्थविरवाद बुद्धधर्म पुनरुत्थान यायेगुली अग्रजम्ह, प्रकाण्ड बौद्ध विद्वान्, वृषमान वैद्यया काय् जगतमान वैद्य-धर्मादित्य धर्माचार्यजु थ्व हे सप्तपुर महाविहारयाम्ह कुलपुत्र खः ।

थौ तक्कं थुगु बहीयात संरक्षण यायेगुली थनया संघपिनिगु कुतः व समर्पणयात नं बौद्ध विहारया ख्यलय् छगू विशेषता हे धायेमाः ।

कचाबही :

- | | | |
|---------------------|--------------------|--|
| १। मणिकुल विहार | - बुरमा वैद्यबाहा: | - (ने. सं. १८९ स स्थापित।) |
| २। त्रिरत्न विहार | - चिबाहा:ननीबाहा: | - (ने. सं. १९० स स्थापित।) |
| ३। भैषज्यराज विहार- | भैषज्यबाहा: | - (ने. सं. १९८ स स्थापित।) |
| ४। सुमंगल विहार | - कुलरत्न बाहा: | - (भैषज्यराज विहार निर्माताया
कुलपुत्र जिवनरसि शाक्य
पाखें स्थापित।) |



आर्यश्रीवसुन्धरानामधारणीस्तोत्रम्

ॐ नमो भगवत्यै आर्यश्रीवसुधारायै ॐ

दिव्यरूपी सुरूपी च सौम्यरूपी बलप्रदा ।
वसुधरी वसुधारी वसुश्री श्रीकरी वरा ॥१॥
धरणी धारणी धाता स(श)रण्या भक्तवत्सला ।
प्रज्ञापारमिता देवी प्रज्ञा श्रीबुद्धिवर्धिनी ॥२॥
विद्याधरी शिवा शू(सू)क्ष्मा(क्ष्मा)शास्ता सर्वत्र मातृका ।
तरुणी तारु(र)णी देवी विद्यादानेश्वरेश्वरी ॥३॥
भूषिता भुतमाता च सर्वाभरणभूषिता ।
दुर्दान्तत्राश(स)नी भीता उग्रा उग्रपराक्रमा ॥४॥
दानपारमिता देवी वर्षणी दिव्यरूपिणी ।
निधानं सर्वमाङ्गल्या कीर्तिर्लक्ष्मीर्यशः शुभा ॥५॥
दहनि(नी) मालनी चण्डी शवरी सर्वमात्रिका ।
कृतान्तशाश(स)नी रौद्री कौमारी विश्वरूपिणी ॥६॥
वीर्यपारमिता देवी जगदानन्दरोचनी ।
तापसी उग्ररूपी च ऋद्धिसिद्धिबलप्रदा ॥७॥
धन्या पुण्या महाभागा अजिता जितविक्रमा ।
जगदेकहिता विद्या संग्रामे तारणी शुभा ॥८॥
क्षान्तिपारमिता देवी शीलनी ध्यानध्यायनी ।
पद्मनी पद्मधारीश्च(री च) पद्मासनी ॥९॥
शुद्धरूपी महातेजा हेमवर्णा प्रभाकरी ।
चिन्तामणिमहादेवी प्रज्ञापुस्तकधारिणी ॥१०॥
निधानं कूटिमारूढिधन्यागारधनप्रिया ।
त्रैधातुकं महा आदि दिव्याभरणभूषिणी ॥११॥
मातरी सर्वबुद्धानां रत्नधातेश्वरेश्वरी ।
शून्यता भावनी देवी भावाभावविवर्जिता ॥१२॥

वैन्ये(ने)य किं न विन्यस्ता दिव्यक्लेशनिछेदनी ।
 भी(भे)दिनी सर्वमाराणां सप्तपातालक्षीभिनी(णी) ॥१३॥
 ब्राम्हणी वेदमाता च गुह्य च गुह्यवासिनी ।
 सरस्वती विशालाक्षी चतुर्ब्रम्हविहारिणी ॥१४॥
 ताथागती महारम्या वज्रिणी धर्मधारणी ।
 कर्मधातेश्वरी विद्या विश्वज्वालाभमण्डली ॥१५॥
 बोध(धि)नी सर्वसत्त्वानां बोध्यङ्गकृतशेखरी ।
 ध्याना धीर्मुक्तिसंपन्न(ा) अद्वयद्वयभाविनी ॥१६॥
 सर्वार्थसाधनी भद्रा स्त्रीरूपामितविक्रमा ।
 दर्श(र्शि)नी बुद्धमार्गाणां नष्टमार्गप्रदर्श(र्शि)नी ॥१७॥
 वागीश्वरी महाशान्ति(र्) गोप्ति(प्त्री) धात्री धनप्रदा ।
 स्त्रीरूपा धारिणी सिद्धा योगिनी योगजेश्वरी ॥१८॥
 मनोहरी महाक्रान्तिः शौ(सौ)भाग्यप्रियदर्शिनी ।
 सार्थवाहकृपादृष्टि (ः) सर्वताथागतात्मकी ॥१९॥
 नमस्तेऽस्तु महादेवी सर्वसत्त्वार्थदायिनी ।
 नमस्ते दिव्यरूपी च वसुधारा नमोऽस्तु ते ॥२०॥
 अष्टोत्तरशतं नाम त्रिकालं यः पठेद्धि(त् पु)मान् ।
 प्राप्नोति नियतं सिद्धिमीप्सितार्थमनोरथान् ॥२१॥
 यदज्ञानकृतं पापम् आनन्तर्यसुदारुणम् ।
 तत्सर्वं क्षपयत्याशु स्मरणात् स(र्व)भद्रकम् ॥२२॥
 अथवा शीलसंपन्नः सप्तजातिस्मरो भवेत् ।
 प्रियश्चादेयक्येन रूपवान् प्रियदर्शनः ॥२३॥
 विप्रक्षे(क्ष)त्रियकुलेषु आदेयमुपजायते ।
 अन्ते भूमीश्वरं प्राप्तं(प्तः) पश्चात् प्राप्तः(ः) सुखावतीम् ॥२४॥

इति श्रीवसुधारानामधारणीस्तोत्रं सम्यक्संबुद्धभाषितं समाप्तम् ॥



॥ आर्यश्रीवसुन्धरादेवी ॥

आर्यश्रीवसुन्धरादेवीया परिचय

नेपाःया बौद्ध समाजय् बुद्ध बोधिसत्त्व व बुद्धधर्म नाप सम्बन्धित अनेक देवीदेवतापिनिगु ध्यान भावना यानाः पूजा यायेगु, तुतः ब्वनेगु, धारणी ब्वनेगुया नाप नाप वसपोलपिनिगु नामं धलं दनेगु नं चलन दु । थ्वहे भवलय् वसुन्धरादेवीया नामं दय्दसं धलं दनेगु, पूजा पाठ यायेगु व वसपोलया नामं हे थी थी नखः हनेगु नं चलन दु । प्राचीनकालनिसें श्रद्धाभाव पिज्वयेकाः पूजा यानावयाच्चम्ह, लोकप्रसिद्ध वसुन्धरा देवीयागु बुद्धधर्मया क्षेत्रय् विशेष महत्व दु । थनयापिसं वसुन्धरायात अन्न, धन, रत्नया देवीया रूपय् हनावना यानावयाच्चंगु दु । पृथ्वीया प्रतीक कथं नं नालावयाच्चम्ह वसपोलयात मूलरूपं बुद्धधर्मया उत्कृष्ट ज्ञान-प्रज्ञाज्ञानया प्रतीकया रूपय् नं कयातःगु दु । उकिं वसपोलयात वरदायनीया नाप नाप बुद्धजननीया स्वरूपय् श्रद्धापूवक पूजा यानावयाच्चंगु जुल ।

भगवान् बुद्धं फुक्क प्राणीपित अनुकम्पा तयाः सकलसिगु सुख शान्तिया निमित्त वसुन्धरादेवीयागु पूजा-पाठ यायेगु, धलं दनेगुयात कयाः उजं दयेकाबिज्याःगु खं 'आर्यवसुन्धराकल्पसूत्र' नांगु ग्रन्थय् न्ह्यथनातःगु दु । भगवान् शाक्यमुनि बुद्ध कौशाम्बि महानगरया घोषितारामय् विहार यानाच्चनाबिज्याःगु इलय् सुचन्द्र गृहपति महाजनयात धर्म देशना यानाबिज्याःगुकथं अतित कालय् वज्रधरसागरनिर्घोष नाम तथागतं आर्यवसुन्धरादेवीयात श्रद्धाभावं उपासना यानाः वसुन्धरादेवीया मण्डः दयेकाः धलं दनेगु, पूजा-पाठ यायेगु विधि विधानया नापं धलं दनागुया पुण्यं दुःख दारिद्र मोचन जुयाः मनं तुनागु पूवनीगु खं उजं दयेकाबिज्याःगु खः । थ्व हे इलनिसें वसुन्धरादेवीया नामं धलं दनेगु चलन न्ह्यानावःगु खंयात कयाः नं वसपोलं उजं दयेकाबिज्याःगु जुल ।

वसुन्धराया शब्दार्थ व प्रतीकात्मक स्वरूप :

पृथ्वीया अनेक नां मध्यय् वसुन्धरा छगू नं खः । पृथ्वीयात भूमि, धरती, मही, धरणी, वसुधा, वसुमति, वसुन्धरा आदि आपालं नां छ्यलातःगु दु । पृथ्वीया हे प्रतीकात्मक स्वरूपम्ह जूगुलिं वसुन्धरायात पृथ्वीमाता नं धाइगु खःसा देवीमा रूपय् वसुन्धरादेवी धका नं लुमंकाच्चंगु दु ।

वसुन्धरा खँग्वः 'वसु' व 'धरा' निगू खँग्वःया छगू रूप खः । थुगु निगू खँग्वःयात कयाः साधारण अर्थ यायेबलय् 'वसु' धैगुलिं अनेक अन्न, धन, रत्न आदि धनद्रव्यया रूपय्, अले 'धरा' धैगुलिं धारण यानाच्चंम्ह धयागु अर्थ पिहांवइ । उकिं अन्न, धन, रत्नादि धारण यानाबिज्याःम्हया अर्थय् वसुन्धरायात कयातःगु दु । वसुन्धरायात कयाः थथे धयातःगु दु -

“वसु दधाति इति वसुधा, वसु धारयतीति वसुन्धरा” अर्थात्, धन धारण यानाच्चंगु जुयाः वसुधा धाःगु खः । अले वसु धारण यानाच्चंम्ह जुयाः वसुन्धरा धाःगु खः । थन 'दधाति' खँग्वःया अर्थ 'धारण यायेगु' या नाप नाप 'पालन पोषण याइम्ह'या अर्थय् नं कयातःगु दु । थ्व अर्थ कथं वसु धारण यानाच्चंम्ह व वसु (धन) बिया पालन पोषण याइम्ह वसुन्धरा खः ।

वसुन्धरादेवीयात लौकिक सम्पत्ति दायनीया रूपय् पृथ्वी आदिया प्रतीककथ कयातःगु दुसा लोकोत्तर सम्पत्ति दायनीया रूपय् बुद्धजननी, समताज्ञान, प्रज्ञाज्ञान आदिया प्रतीककथं कयातःगु दु ।

वसुन्धरादेवीया ध्यान व अर्थ विशुद्धि :

बौद्ध साहित्यय् वसुन्धरादेवी अकनिष्ट भुवनय् च्वनाबिज्याइम्ह देवीया रूपय् न्ह्यथनातःगु दु । वसपोल प्राणीपिनिगु उद्धार यायेत छगू भुवनं मेगु भुवनय् च्वनाबिज्याइम्ह कथं नं न्ह्यथनातःगु दु । थुकथं हे वसुन्धरादेवीया ध्यान ज्ञानयात कयाः नं बौद्ध साहित्यय् दुथ्याकातःगु दु । वसपोलयागु ध्यान ज्ञानयात कयाः विशेष यानाः साधनामाला, श्रीवसुन्धरा परिपृच्छ सूत्र, वसुन्धरा व्रतोत्पत्ति अवदान, विमलावती अवदान, दानासूर पत्नी यक्षणी कथा, वसुन्धरा व्रत विधि ग्रन्थादिइ न्ह्यथनातःगु दु ।

वसुन्धरादेवी छपाः ख्वाः निका ल्हाहा दुम्ह, छपाः ख्वाः खुका ल्हाहा दुम्ह, स्वपाः ख्वाः खुकाल्हाहा दुम्ह आदि अनेक रूपयापिं वर्णन दु । थुकी मध्यय् नेपालय् न्हापानिसें वसुन्धरा व्रतय् दुथ्याकातःम्ह स्वपाः ख्वाः खुका ल्हाहा दुम्ह वसुन्धरादेवीयात हे नालावयाच्चंगु दु ।

स्वपाः ख्वाः खुका ल्हाहा दुम्ह वसुन्धरादेवीया ध्यान वर्णन यानातःगु कथं वसपोलं वज्रधरसागरनिर्घोष तथागत दूगु मुकुटं पुयाः फुक्क प्रकारया तिसा वसत पुनाः नवयौवनं सम्पन्नम्ह, खुका ल्हाहातिं थीथी मुद्रा ज्यानाः ललिताशनय् च्वनाः जवगु तुति शंख सहितगु कलशय् दिकाः मुसुहुं न्हिलाः आनन्द बिज्यानाच्चंम्ह खः ।

वसुन्धरादेवीया स्वपाः ख्वाः मध्यय् दथुया ख्वाः म्हासु (पीत) वर्ण, जवगु ख्वाः ह्ये ह्ये धाःगु (कुंकुम) वर्ण व खवगु ख्वाः ह्याउं (रक्त) वर्णगु खः । अथे हे वसपोलया खुका ल्हाहा मध्यय् जवगु स्वका ल्हाहातिं छसिकथं तथागत वन्दना (गुगु सफुतिइ जपमाला ज्वनाः तथागत वन्दना) मुद्रा, रत्नमञ्जरी व वरद मुद्रा ज्यानाच्चंगु दुसा, खवगु स्वका ल्हाहातिं छसिकथं सफू, वाग्वी व कलश (लःघः) ज्वनाबिज्याःगु दु । वसुन्धरादेवीया शरीरया वर्ण काञ्चनवर्ण अर्थात् पाः कयातःगु लुंयागु थें जाःगु वर्णगु खः ।

वसुन्धरादेवी रत्नसम्भव तथागतया कुल उत्पन्न जुयाबिज्याःम्ह खः धयातल । रत्नसम्भव तथागतया वर्ण म्हासुगु जूगुलिं वसुन्धरादेवीया शरीरया वर्ण नं म्हासु वर्णम्ह जूवगु खः धका नं धयातल । वसपोल वसुन्धरादेवी म्हासु वर्णम्ह जूगुलिं हे वसुन्धरादेवीयागु पूजा याये बलय्, वसुन्धराव्रत दनीबलय् वसुन्धरा मण्डलनिसें पूजा ज्वलनय् तालाकेमाःगु पोताय्, कापः, व्रतसूत्र, स्वां, सिंहः, मरिचरि, फलफुल, वाग्वी, वा, तःसी आदि फुक्कं म्हासुगु हे छयलावयाच्चंगु जुल ।

वसुन्धरादेवीं धारण यानाबिज्याःगु स्वपाः ख्वाः व खुका ल्हाहाया ज्वंसायात कयाः थी थी अर्थ विशुद्धि यानातःगु दु । वसपोलया स्वपाः ख्वाः मध्यय् जवय् च्वंगु कुंकुम वर्णगु ख्वाः महालक्ष्मीया रूपय् कयातल । अथे हे खवगु रक्तवर्णगु ख्वाः कौमारीया रूप, दथुया मूलगु पीतवर्णगु ख्वाः स्वयं वसुन्धरादेवीया थःगु हे वास्तविक रूप खः । थ्व स्वम्हं वसुन्धरादेवी हे खः धका स्वपाः ख्वाः धारण यानाच्चंगु जुल ।

वसुन्धरादेवीया स्वपाः ख्वाःयात स्वंगू कालया रूपय् नं कयातःगु दु । वसपोलया जवगु ख्वाः प्रातः काल, दथुया ख्वाः मध्यान्ह काल व खवगु ख्वाः सन्ध्या कालया रूपय् कयातःगु दु । थ्व अर्थय् वसुन्धरादेवी प्रातः कालय् कुंकुमवर्णयाम्ह महालक्ष्मीया रूपय्, मध्यान्ह कालय् पीतवर्णयाम्ह स्वयं थःगु हे रूपय्, अले सन्ध्या कालय् रक्तवर्णयाम्ह कुमारीया रूपय् जुयाबिज्याःम्ह खः । वसपोलया थ्व हे स्वंगू वर्णगु स्वपाः ख्वाःयात सांकेतिक दृष्टिकोणं सृष्टि, स्थिति व संहारया स्वरूप कथं कयातःगु दु । संसारया नियमकथं छुं नं वस्तुया उत्पत्तिं लिपा छुं क्षण अवधि तक्क थातं च्वनाः विनाश जुयावनीगु स्वभावगु खः । संसारयागु क्षण भंगुर नियमयात म्हासिइकेत उत्पत्ति, स्थिति, भंगया ज्ञानयात कयाः वसुन्धरादेवी स्वपाः ख्वाः धारण याना क्यनाबिज्यानाच्चंगु खः ।

वसुन्धरादेवीया ज्वंसा व मुद्रायात कयाः न थी थी सफुतिइ वर्णन यानातःगु दु । वसुन्धरादेवी रत्नसम्भव तथागतया रत्नकुलं उत्पत्ति जूगुलिं वसपोल रत्न स्वभावम्ह खः । वसपोलया निका ल्हाहा मध्यय् छका ल्हाहातिं वरदमुद्रा ज्यानाः मेगु ल्हाहातिं रत्नमञ्जरी ज्वनाच्चंगु दु । रत्नसम्भव तथागतया मुद्रायात कयाः हे थःम्ह नं जवगु ल्हाहातिं वरदमुद्रा ज्यानाच्चंगु खःसा मेगु खवगु ल्हाहातिं रत्नकुलया प्रतीक रत्नमञ्जरी ज्वनाच्चंगु खः । थन रत्न धायेबलय् साधारण अर्थ कथं जवाहरात, नवरत्नादि खःसा थुकीया वास्तविक अर्थय् वसपोलं धारण यानाबिज्याःगु रत्नयात परमार्थ बोधिचित्तया रूपय् कयातःगु दु । अर्थात् दुःखी प्राणीपित करुणा तयाः समताज्ञानया लागी चिन्तामणि रत्नरूपी बोधिचित्तरत्न प्रदान यानाबिज्यानाच्चंगुया रूपय् कयातःगु जुल ।

वसुन्धरादेवीया खुका ल्हाहातिइ च्वंगु ज्वंसा व मुद्रायात कयाः वसुन्धराव्रत विधि सफुतिइ थुकथं वर्णन यानातःगु दु -

१. वरदमुद्रा : सकलसत्त्व प्राणीपित पृथ्वीमण्डलय् दूगु हिरा-मोति आदि नाना रत्न, लुं-वहः आदि नाना धातु व धान्य आदि वा-जाकि, नाना प्रकारया वृहि सकता वरदान बियाबिज्याकम्हया अर्थय् जवगु छका ल्हाहातिं भूमि थियाः वरदमुद्रा ज्यानाच्चंगु स्वरूप ।
२. रत्नमञ्जरी : चिन्तामणिरत्नया माला ज्वनाः लोकजनयात मनं तुनागु पूवका बिज्याच्चम्हया अर्थय् मेगु जवगु छका ल्हाहातिं रत्नमञ्जरी ज्वनाबिज्यानाच्चंगु स्वरूप ।
३. तथागत वन्दना : थःगु मुकुटय् बिज्यानाच्चम्ह वज्रधरसागरनिर्घोष तथागत (गनं गनं मुकुटय् रत्नसम्भव तथागत बिज्याकातःगु उल्लेख दु ॥) यात वन्दना यानाच्चंगुया अर्थय् जवगु स्वकागु ल्हाहातिं तथागत वन्दना मुद्रा ज्यानाच्चंगु स्वरूप ।
४. भद्रघट (कलश) : सम्पूर्ण सत्त्व प्राणीपित सद्धर्मचर्या बोधिचर्याय् तयाः सम्पूर्ण कलशय् च्वंगु अमृतजलं अभिषेक बिइत खवगु छका ल्हाहातिं सम्पूर्ण कलश ज्वनाबिज्याकम्ह स्वरूप ।
५. धान्यमञ्जरी (वाग्बी) : संसारया समस्त प्राणीपित प्रतिपालन यायेया कारणय् खवगु निकागु ल्हाहातिं वाग्बी ज्वनाः सप्तवृहि पूर्ण यानाबिज्यानाच्चंगुया स्वरूप ।

६ पुस्तक (सफू) : लोकजनया अज्ञान नाश यानाः प्रज्ञा व उपाय बांधिज्ञान प्राप्त याकाविज्यायंत खवगु स्वकागु ल्हाहाति प्रज्ञापारमिता सफू ज्वनाविज्यानाच्वंगु स्वरूप ।

वसुधरादेवीया ध्यान वर्णनयागु हे क्रमय वसपोल ललिताशन यानाः शंख दूगु कलशया द्यःने थःगु जवगु तुति दिकाविज्यानाच्वंगुयात कयाः न अर्थ विशुद्धि यानातःगु दु । वसपोल भद्रघट-कलश उत्पन्न जुयाविज्याःम्ह देवी जूगुलि हे कलशय तुति दिकाविज्यानाच्वंगु खः । मेगु अर्थय शुद्धता, परिपूर्णता व विशुद्धताया प्रतीकया रूपय न कलशय तुति दिकाविज्यानाच्वंगु खः ।

वसुधरादेवीया खुगू मुद्रायात कयाः सप्तवृद्धि-आयुवृद्धि, यशवृद्धि, प्रज्ञावृद्धि, धनवृद्धि, गुणवृद्धि, सुखवृद्धि, सन्तानवृद्धिया रूपय न तुलना यानातःगु दु ।

वसुधरादेवीया वरदमुद्रा सन्तानवृद्धिया प्रतीक खः । पृथ्वीया आधारय म्वानाच्वपि प्राणीपि धाक्व वसुधरादेवीया सन्तान खः । वसपोलयाके च्वंगु रत्नमञ्जरी धनवृद्धिया प्रतीक खः । अथे हे वसपोलया छका ल्हाहाति जपमाला ज्वनाः तथागत वन्दना मुद्रा प्रकृति धर्मयात चिन्तन मनन यानाः थःगु मुकुटय विज्यानाच्वम्ह तथागतयात वन्दनायाना प्राप्त जुइगु गुण हे गुणवृद्धि कथ अर्थ विशुद्धि यानातःगु दु । हान, वसपोल धारण यानातःगु भद्रघट-कलश यशवृद्धिया रूपय कयातःगु दु । अभिषेकादि ग्रहण यायेगुया अर्थय यशयात कयातःगु जुल । गुलि न पुखू, हिति, तु, जलाशय, समुद्र आदिया प्रतिनिधित्व कलश लखं यानाच्वंगु दु । उकि हे विभिन्न धार्मिक ज्या-खंय कलशाभिषेकयात विशेष महत्त्व वियाः पूर्णताया स्वरूप कलशयात कयातःगु जुल । वसपोलयाके च्वंगु वाग्बी आयुवृद्धिया प्रतीक खः । वा-जाकि अन्नादि व स्कन्धमुलादिया कारण प्राणीपि जीवित जुयाच्वंगुया कारणय धान्यमञ्जरी (वाग्बी) यात आयुवृद्धिया प्रतीकया रूपय कयातःगु जुल । सद्वर्मज्ञान आर्जन यायेगु प्रतीक स्वरूप वसपोलयाकेच्वंगु सफूति प्रज्ञावृद्धिया प्रतिककथ कयातःगु जुल । अले सुखवृद्धिया रूपय सकलसित हित सुख यानाः उपकार यानाविज्याइम्ह वसुधरादेवी स्वयंयात कयातःगु जुल ।

वसुधरादेवीया अनेक रूप दु थें अनेक ना न दूगु जुल । वसपोलयात समस्त लोक प्रतिपालक श्रीलक्ष्मी, सिद्धिलक्ष्मी, धनलक्ष्मी, बुद्धजननी, आर्यतारा, प्रज्ञादेवी आदि अनेक ना बियातःगु दु । वसुधरा कल्पसूत्रय वसपोलयात १०८ गू नाम सस्मरण यानाः स्तुति यायेगु खं दुध्यानाच्वंगु दु ।

वसुन्धरादेवीयात विभिन्न देवीपिनिगु प्रतिनिधित्व स्वरूप कथं नं लुमकाच्चंगु दु । वसपोलया वरदमुद्रा ल्लाहात आर्यतारादेवीया स्वरूप कथं कयातःगु दु । अथे हे जपमाला व सफू धारण यानाच्चंगुलिं प्रज्ञापारमितादेवी, रत्नमञ्जरी व धान्यमञ्जरी धारण महालक्ष्मी, सम्पूर्ण अलक्षणं अलग्ग जुयाः फुक्क सम्पूर्ण जुयाच्चनाविज्याःगुलि कुमारी, कलशं उत्पन्न जुयाविज्याःम्ह जूगुलिं नैरात्मादेवी, कलश हे आशन यानाः फुक्क ज्ञान, गुण, लक्षणं पूर्णगु अभेद्यज्ञान स्वरूपिनीदेवी जुयाः कलश ज्वनाः अभिषेक प्रदान यानाविज्याइम्हया रूपय् वज्रदेवीया प्रतिनिधित्व स्वरूपिम्ह क्यनातःगु जुल ।

हानं, वसुन्धरादेवी प्यंगूयुग-चतुर्युग भेदया ल्याखं प्यंगू हे नामं प्रसिद्धम्ह खः । वसपोल सत्ययुगय् वज्रदेवी, त्रेतायुगय् वसुन्धरादेवी, द्वापरयुगय् महालक्ष्मीदेवी व कलियुगय् कौमारीदेवी स्वरूपम्ह खः ।

वसुन्धराव्रत-गातिला धलं व थ्वया दिं :

व्रत च्वनेगु न्हापांनिसेयागु चलन खः । प्राचीनकालनिसे विभिन्न धर्मावलम्बिपिनिगु समाजय् थः थःपिनिगु धर्म व संस्कृतियात कयेच्यानाः आपालं श्रद्धाभक्ति तयाः अनेक देवीदेवतापिनिगु नामं व्रत-उपवास च्वनेगु प्रचलन न्ह्यानावयाच्चंगु दु ।

व्रत च्वनेगु धैगु धलं दनेगु खः । अष्टशील पालन यानाः धलं दनेगुयात बौद्ध समाजय् विशेष महत्त्व वियावयाच्चंगु दु । नेपालय्, खासयानाः नेवाः बौद्ध समाजय्, धलं दनेगु भवलय् वसुन्धरादेवीया नामं धलं दनेगुयात नं महत्त्व वियाः दुध्याकातःगु दु । सकल सत्त्व प्राणीपिनिगु भिं-कामनां काय, वाक्, चित्त शुद्ध यानाः भिगू अकुशल कर्म त्याग यानाः अष्टशीलादि पालन सहित वसुन्धराव्रत च्वनेगुयात नेवाः बौद्ध समाजं जीवन्तता वियावयाच्चंगु दु ।

लौकिक सम्पत्तिया नाप नापं लोकोत्तर सम्पत्ति-बोधिचित्तरत्न प्रदान यानाविज्याइम्ह वसुन्धरादेवीयात लुमकाः बोधिचित्त उत्पन्न यानाः शून्यता भावनाद्वारा सर्वधर्मनैरात्म्यया ज्ञान आर्जन यानावनेगुया हेतु जुयाच्चम्ह वसुन्धरादेवीया नामं धलं दनेगु यानावयाच्चंगु जुल ।

दँय्दसं भाद्रकृष्ण तृतीया कुन्हु वसुन्धराया धलं दनीगु खः । थुगु धलं दनेगु दच्छिइ छकः जक मयाःसे लय् लय् पत्तिं कृष्णपक्षया तृतीया कुन्हु, दँय् भिनिगु दनेगु नं चलन दु । प्रत्येक दँय् भाद्रकृष्ण तृतीया कुन्हुनिसे न्ह्याकाः श्रावणकृष्ण तृतीया तक्क भिनिलायक वसुन्धराव्रत दनीगु जुयाः थुकीयात 'द्वादशमास वसुन्धराव्रत'

धका न धायेगु याः । अये न लय् लय् पत्ति च्वने मफुसा भाद्रकृष्ण तृतीया व माघकृष्ण तृतीया यानाः खुलाय् छकः वसुन्धराव्रत दनेमाः गुयात कयाः बौद्ध साहित्यय् न्ह्ययनातः गु दु । थये खः सा आपाः याना नेवाः बौद्ध समाजय् दय् छकः भाद्रकृष्ण तृतीया कुन्हु हे जक व्रत च्वनेगु यानावयाच्वंगु दु । थुगु व्रत तिथिया ल्याख तृतीया कुन्हु च्वनीगु जुयाः थुकीयात तृतीया व्रत न धायेगु याः ।

वसुन्धरा व्रतयात नेवाः समाजय् 'तिला व्रत' व 'गातिला व्रत' कथ म्हासिकाच्वंगु दु । वसुन्धरा व्रतयात तिला अथवा गातिला व्रत धाःवंगुया थःगु हे अर्थ दु । नेवाः भाषा महिनायात 'ला' धाङ्गु खः, अले तृतीयायात संक्षिप्त 'ति' जक प्रयोग यानाः तृतीया व्रतयात 'तिलाव्रत' धाःवंगु खने दु । अथे हे थुगु व्रत प्रत्येक महिनाया कृष्णपक्ष तृतीया कुन्हु दनीगु जुयाः थुकीयात न जनभाषा 'गातिला' धाःवंगु खः । अर्थात् तृतीया व्रतयात तिला धाःव थें कृष्णपक्षयात नेवाः भाषा 'गा' धाङ्गु खः । ख्वहे अर्थय् कृष्णपक्ष महिनाया तृतीया तिथि कुन्हु च्वनीगु व्रत जुयाः थुकीयात 'गातिला' धयावयाच्वंगु जुल ।

गातिला धल दनीवलय् वसुन्धरा महामण्डल दयेकाः धार्मिक विधि विधान अनुसार पूजाया नाप शीलादि पालन यानाः च्वनेमाःगु थःगु हे नियम दु । वसुन्धराव्रत-गातिलाया बारे व वसुन्धरादेवीया सांस्कृतिक, ऐतिहासिक पक्ष व अन्य विविध विषयया जानकारीया लागी थुगु सफूया च्वमियागु अनुसन्धान मूलक कृति 'नेपालको बौद्धधर्ममा वसुन्धरादेवी' अध्ययन याये ब्रह्मजु ।

यलय् वसुन्धरा पूजा व थुकीया परम्परा :

यलय् दय् दस वसुन्धराव्रत-गातिला धल दनेगुया नाप नाप यल नगर क्षेत्रया दुने च्वंगु महाविहार, बहीविहार, चुक, ननि व त्वाः त्वालय् स्वनातःपि वसुन्धरादेवीया पूजाय् विभिन्न पूजा ज्वल, छायेवः ज्वल ज्वनाः अनेक ब्राज यानाः धार्मिक उत्सवया रूपय् वसुन्धरा पूजा व प्रदक्षिणा यायेगु चलन दु । गातिला धल दनाः कन्हे । भाद्रकृष्ण चतुर्थी कुन्हु वसुन्धरा पूजा वनीगु खः । थनि २५ द न्ह्यः ने स १०९७ वि स २०३४ साल निसं वसुन्धरा पूजा वनेगु ज्या न्ह्याःगु खः । यल, इखालखु-तःलाछि निवासी श्रीसिद्धिराज व वय्कःया जहान तुयुनानी उपासिका व सपरिवारपनिगु पाखे थःपनिगु निवास स्थानय् २०३३ साल श्रीवसुन्धरादेवी प्रतिस्थापना यानाः वया दच्छि लिपा भाद्रकृष्ण तृतीया कुन्हु वसुन्धरा व्रत दनाः वया कन्हे कुन्हु

नगर परिक्रमा यानाः वसुन्धरा पूजा यायंगु ज्या न्हापाखुशी न्ह्याकूगु जुल ।

थुगु वसुन्धरा व्रत व पूजा दय् दसं मदिक्क न्ह्याकायकेगु हेतुं यःपिस स्वदयंकं पाः फयाः लिपा यलया विभिन्न बाहाः बही व त्वाः त्वालं सामुहिक वा व्यक्तिगत रूपं ग्वःसाग्वयाः थुकीयात निरन्तरता बियावयाच्चंगु जुल । थ्व हे भवलय् थुगुसी २०५९ सालं सप्तपुर महाविहार, चिकंबही, च्यासः त्वाः, यलया ग्वःसालय् वसुन्धरा व्रत व पूजाया ज्या न्ह्याकीगु जुल ।

थौ तक्कया दुने यलय् थुगु व्रत व पूजा क्वय्चवया कथया बाहाः बही व श्रद्धालुदातापिनिगु पाखें ग्वःसाग्वयाः न्ह्याके थुकूगु जुल -

नां	थाय्	दै
१. सिद्धिराज तुलाधर	तःलाछि	वि सं २०३४
२. सिद्धिराज तुलाधर	तःलाछि	वि सं २०३५
३. सिद्धिराज तुलाधर	तःलाछि	वि सं २०३६
४. रत्नाकर महाविहार	हःखबाहाः	वि सं २०३७
५. पद्मावती महाविहार	नःबाहाः	वि सं २०३८
६. श्रीवच्छ महाविहार	सिवाहाः	वि सं २०३९
७. रक्षयेश्वर महाविहार	पूचो क्वथूबही - मुक्तबहादुर धाखा	वि सं २०४०
८. दत्तनाम महाविहार	दौबाहाः	वि सं २०४१
९. मयूरवर्ण महाविहार	भिन्छेबाहाः	वि सं २०४२
१०. च्यासःत्वाः	च्यासः	वि सं २०४३
११. अक्षयेश्वर महाविहार	पूचो थथूबही	वि सं २०४४
१२. तारेमाम् संघ	नागबाहाः	वि सं २०४५
१३. सिद्धिराज तुलाधर	तःलाछि	वि सं २०४६
१४. चक्रवर्ण महाविहार	चुकबाहाः - रत्नराज वज्राचार्य	वि सं २०४७
१५. जेष्ठवर्ण महाविहार	तंगःबाहाः - पन्नालाल शाक्य	वि सं २०४८
१६. पद्मावती महाविहार	नःबाहाः - भिमराज शाक्य	वि सं २०४९
१७. वैशवर्ण महाविहार	गुजिबाहाः - भिमराज शाक्य (बाबुसाहेब)	वि सं २०५०
१८. सुरश्चन्द्र महाविहार	न्हाय्कंबही	वि सं २०५१
१९. प्रथमश्री महाविहार	गुइतःबही	वि सं २०५२
२०. मंगलदास महर्जन, सानु महर्जन	इखाछें, भगवति लाछि	वि सं २०५३

२१	जयमनोहर महाविहार	सौवाहा:	वि. सं. २०५४
२२	धर्मकीर्ति महाविहार	भैरवकुट विहार, नकिभ्या:	वि. सं. २०५५
२३	वैशवर्ण महाविहार	गुजिवाहा:-भिमराज शाक्य (बाबुसाहेब)	वि. सं. २०५६
२४	कामुकनाम महाविहार	तःधंगु ख्वाय्बही - हर्षमाया शाक्य	वि. सं. २०५७
२५	यशोधर महाविहार	बुवाहा: - बुद्धिराज वज्राचार्य	वि. सं. २०५८
२६	सप्तपुर महाविहार	चिकंबही, च्यास:त्वा:	वि. सं. २०५९

वसुन्धरा पूजाय् दुथ्यानाच्चं पिं वसुन्धरादेवीपिनिगु स्थाननाम धल: :-

नां	त्या:
१. चिकंबही, च्यास:या वसुन्धरा	२
२. ओम्बाहा:या वसुन्धरा	१
३. ज्यांवाहा:या वसुन्धरा	१
४. सुवाहा:या वसुन्धरा	१
५. तःधंगु गुइतःबहीया वसुन्धरा	१
६. चीधंगु गुइतःबहीया वसुन्धरा	१
७. भिन्छेवाहा:या वसुन्धरा	२
८. ओकुवाहा:या वसुन्धरा	१
९. उवाहा:बहीया वसुन्धरा	१
१०. महाबौद्धया विद्याधरी	१
११. गुजिवाहा:, वसुन्धरा ननिया वसुन्धरा	१
१२. गुजिवाहा:या वसुन्धरा	२
१३. थैना, पालुवाहा:या वसुन्धरा	१
१४. तग:वाहा:या वसुन्धरा	२
१५. चुकवाहाया वसुन्धरा	१
१६. तःवाहाया वसुन्धरा	१
१७. तःलाछिया वसुन्धरा	१
१८. हौग:वाहा:या वसुन्धरा	१
१९. जोम्बाहा:, चिवाहा:ननिया वसुन्धरा	१
२०. जोम्बाहा:या वसुन्धरा	१

२२.	इकुवाहाः, कजिया आगद्यः	१
२३.	न्हाय्कबहीया वसुन्धरा	१
२४.	दौवाहाःया वसुन्धरा	१
२५.	भैरवकुट, नकिभ्याःया वसुन्धरा	१
२६.	हःखवाहाःया वसुन्धरा	१
२७.	हःखवाहाःया कुमारी	१
२८.	बुवाहाःया वसुन्धरा	२
२९.	बुवाहाः, हँय्चुकया वसुन्धरा	१
३०.	नःवाहाःया वसुन्धरा	२
३१.	तःधंगु ख्वाय्बहीया वसुन्धरा	१
३२.	सिवाहाःया वसुन्धरा	१
३३.	पूचो ब्वथूबहीया वसुन्धरा	१
३४.	पूचोया वज्रयागिनी	१
३५.	पूचो थथूबहीया वसुन्धरा	१
३६.	पूचोथूर फलेचाया वसुन्धरा	१
३७.	इतिल्हने दिलक्वया वसुन्धरा	१
३८.	आलको हितिया वसुन्धरा	१
३९.	इखाछँया वसुन्धरा	१
४०.	क्वाःवाहाःया वसुन्धरा	२
४१.	क्वाःवाहाःया क्वाचपाल आजु	१
४२.	क्वाःवाहाःया प्रज्ञापारमिता	१
४३.	क्वाःवाहाःया अमोघपाश लोकेश्वर	१
४४.	धपगाःबहीया वसुन्धरा	१
४५.	कुलिम्बाहाःया वसुन्धरा	१
४६.	धुम्बाहाःया वसुन्धरा	१
४७.	च्यासःया वसुन्धरा	२

वसुन्धरा पूजा मूल समिति

न्याम्ह आजुपिं व सल्लाहकारवर्ग :

- १। थपा:आजु लेखराज वैद्य
- २। आजु ललितराज वैद्य
- ३। आजु लक्ष्मी बहादुर शाक्य
- ४। आजु छवि राज शाक्य
- ५। आजु माइला शाक्य

वसुन्धरा पूजा मूल समिति पदाधिकारी :

- | | | |
|------------------|------------------------|-----------|
| १। अध्यक्ष | : सिद्धि बहादुर शाक्य | चिकबही |
| २। उपाध्यक्ष | : बेखारत्न शाक्य | चिकबही |
| ३। उपाध्यक्ष | : राजेन्द्र व्यञ्जनकार | च्यास: |
| ४। उपाध्यक्ष | : बाबुरत्न अवाले | क्वय्लाछी |
| ५। सचिव | : सुरेन्द्र शाक्य | चिकबही |
| ६। उप-सचिव | : अमिर शाक्य | चिकबही |
| ७। कोषाध्यक्ष | : गौतम शाक्य | चिकबही |
| ८। उप-कोषाध्यक्ष | : विजय बहादुर शाक्य | चिकबही |
| ९। सदस्य | : लिलाराज शाक्य | चिकबही |
| १०। " | : प्रेम शाक्य | नुग: |
| ११। " | : प्रेम राज शाक्य | वानेश्वर |
| १२। " | : देव बहादुर शाक्य | चिकबही |
| १३। " | : नानी बाबु शाक्य | चिकबही |
| १४। " | : भुवन राज शाक्य | भोलढोका |
| १५। " | : सानु राज शाक्य | इखालखु |
| १६। " | : नेम राज शाक्य | चिकबही |
| १७। " | : सानु राजा शाक्य | चिकबही |
| १८। " | : ज्ञानराज शाक्य | चिकबही |
| १९। " | : जयाकर वैद्य | लगनखेल |
| २०। " | : तुरङ्ग बहादुर शाक्य | चिकबही |
| २१। " | : मोहनमान शाक्य | चिकबही |

२२। "	नेम राज शाक्य	चिकवही
२३। सदस्य	राजेन्द्र शाक्य	चिकवही
२४। "	पुष्प शाक्य	नुगः
२५। "	मानकाजी शाक्य	ग्वार्को
२६। "	प्रेमराज वैद्य	बखुण्डोल
२७। "	बसन्त शाक्य	चिकवही
२८। "	राजेश शाक्य	बानेश्वर
२९। "	सुनिल शाक्य	चिकवही
३०। "	ज्ञानेन्द्र शाक्य	चिकवही
३१। "	सन्तोष शाक्य	नुगः
३२। "	गहेन्द्र मान शाक्य	चिकवही
३३। "	नविन शाक्य	चिकवही
३४। "	काजीलाल अवाले	भिन्दोलाछी
३५। "	आशाराम अवाले	क्यय्लाछी
३६। "	नारायण ब्यञ्जनकार	च्यासः
३७। "	कर्म अवाले	भिन्दोलाछी
३८। "	रमेश अवाले	भेलाछें
३९। "	नारायण अवाले	भेलाछें
४०। "	जीवन अवाले	च्वछें
४१। "	चेकराम अवाले	च्वछें
४२। "	शान्त मान शाक्य	ईवही
४३। "	रत्न मान शाक्य	ईवही
४४। "	आशाकाजी ब्यञ्जनकार	च्यासः
४५। "	मंगलवीर ब्यञ्जनकार	च्यासः
४६। "	नारायण अवाले	भिन्दोलाछी
४७। "	श्याम कृष्ण महर्जन	गाःहिति
४८। "	आफुलाल अवाले	तुम्बहाः
४९। "	कान्छा महर्जन	गःछें
५०। "	चन्द्र महर्जन	गःछें
५१। "	ज्ञान बहादुर शाक्य	इलाननी

सन्दर्भ ग्रन्थ-सूची

१. उपाध्याय, जगन्नाथ (संकलन) : धी, आर्यश्रीवसुन्धरानामस्तोत्रम्, अंक ३, केन्द्रिय उच्च तिव्वती शिक्षा संस्थान, सारनाथ, वाराणसी, ई. सं. १९८७।
२. वज्राचार्य, सूर्यमान : वसुन्धरा, आकाश जोगिनीमाता, इखालखु, तःलाछें, यल, वि. सं. २०३७।
३. वज्राचार्य, हेराकाजी : यलया बौद्धविहार - संक्षिप्त परिचय, बौद्धविहार संघ, ललितपुर, अक्षयेश्वर महाविहार, पुल्चोक-३, ने. सं. १९२९।
: गुडतःया बहीविहारसंघ-छगू अध्ययन, दीपावती पुस्तकालय, गुडतः, यल, ने. सं. १९९९।
: नेपालको बौद्धधर्ममा वसुन्धरादेवी, बुद्धिराज वज्राचार्य, बुवहाल, ललितपुर, वि. सं. २०५८।
४. शाक्य, महेन्द्ररत्न : वसुन्धरादेवी छगू अध्ययन, लोटस रिसर्च सेन्टर, प्रयागपथ, ललितपुर-६, ने. सं. १९९४।
५. शाक्य, पं. हेमराज : स्वयम्भू महाचैत्य, स्वयम्भू विकास मण्डल, ये, ने. सं. १०९९।
६. सुचन्द्रावदान (हस्तलिखित) : राष्ट्रिय अभिलेखालयमा संग्रहित।
७. च्वमिया थःगु संग्रहस च्वंगु : वसुन्धरा व्रत विधान पुस्तकम् हस्तलिखित ग्रन्थ (थ्यासफू)।
८. Tiwari, Sudarshan : **Pattern of Settlements in the Kathmandu Valley in Ancient period**, Unpublished Ph.D. Thesis, T. U. Kathmandu, 1995.
९. Locke, John K. - : **Buddhist Monasteries of Nepal**, Sahayogi Press Pvt. Ltd. Kathmandu, 1985



मंगलमय शुभ-कामना

अन्न, धन, रत्नदायिनी, बुद्धिपूर्व्वी, विद्याप्रदायिनी,
 शून्यता स्वरूपिनीदेवी आर्यश्रीवसुन्धरादेवीया
 व्रत-पूजाया लक्षताय् सकलक्षित वसपोलया
 सुदृशित लानाः न्यंकभनं सुख-शान्ति
 जुहुमा धकाः मंगलमय शुभ-कामना
 व्यक्त याना चपना ।




वसुन्धरा पूजा मूल समिति

सप्तपुर महाविहार

चिकंबही, च्यासः त्वाः,

यल ।



भैषज्यराज विहार



सुमंगल विहार

R100-2
5-3

अन्वेषकया प्रकाशित सफूत

१. यशोधर महाविहार संघ : छगू अध्ययन ।
२. नेवा: बौद्ध परम्पराया पूजाक्रियाय् छयलानाला: वयाच्चंगु हलंज्वलं ।
३. बौद्ध न्ह्यस: लिस: ।
४. युवक बौद्ध मण्डल, नेपालया गतिविधि व बौद्ध न्ह्यस: लिस: (सम्पादन) ।
५. सम्वरोदय दशमी (दिशी) पूजाविधि पुस्तकम् (सम्पादन) ।
६. त्रि-समाधि पूजाविधि पुस्तकम् (सम्पादन) ।
७. गुरुमण्डलार्चन पूजाविधि पुस्तकम् (सम्पादन) ।
८. गुइत:या बहि विहार संघ : छगू अध्ययन ।
९. यलया बौद्ध विहार - सक्षिप्त परिचय ।
१०. सद्धर्म पाठ संग्रह (सम्पादन) ।
११. नेपालको बौद्धधर्ममा वसुन्धरादेवी ।
१२. आर्यग्रहमातृकानाम धारणी (सम्पादन) ।
१३. स्नानार्चन विधि पुस्तकम् ।
१४. सप्तपुर महाविहार व आर्यश्रीवसुन्धरादेवीया परिचय ।